

七十二家集

江醴陵集卷之十二

梁濟陽江淹文通著

明閩漳張燮紹和纂

啓

爲建平王慶改號啓

竊以皇衢永謐則玉曆惟禎國慶方夷則繩澤  
式茂故五鳳協年甘露應號况今道潤衍濫頌  
祉載繁嘉生蠲慶風雲瑞節旣覲昭晨方鑄昌  
化延守一隅無以自屈不勝荒情

爲建平王讓鎮南徐州刺史啓

臣言臣誓惟殃釁頻寫曲折慊慊狂愚薰蒙哀  
弔而聖旨懸嚴便賜斷表神垂意失音影何地  
吞悲茹號情膽載絕臣荒昧神氣爰自幼稟分  
踰鼎貴秩高外州臣乏素能或所不任況在憂  
年必取黜辱特爲開非常之恩借權製之義紊  
禮滅經實翦治本臣又能身祈命請一感天地  
躑躅表啓心容已覩猶疑大道之行墨綬不興  
孝治天下通喪獲遂陛下覆被仁明品物無漏

豈於微臣獨不蠲鑒焦鯁在躬輒復塵觸伏願  
暫輟聽覽少憐苦草則臣死之日猶生之年臨  
啓恍惚竊識無主不勝殞越怵息之心

爲建平王謝賜石硯等啓

臣言奉勅賜石硯及法書五卷天旨又以臣書  
小進更使勤習敬閱續篆側觀硯功張衛慙奇  
金瓊羞麗臣風乏翰能素謝篇伎空責恩輝徒  
隆慈飾方停煙墨永砥學玩仰結聖造伏銘私  
荷不任下情

爲建平王謝玉環刀等啓

奉勅賜玉環刀等五種珍器

缺

伏蒙猥降飾

軼采朱跨影懸魄崑岡歸琛關山慙寶謹襲緹素以克握睇垂光旣深銘佩更積不任下情

爲蕭領軍讓司空并敦勸啓

臣某言臣忝心之請丹誠以傾詔旨冲挹便賜  
斷表伏聞當遣王人猥垂獎勸仰天光休俯增  
驚厲中謝臣以爲槐鉉之任百王攸先具司是  
歸冠冕式瞻化曜昌輝連基政務事深崇替迹  
豫興衰故道富一時則風行明令才乏通權則  
山摧河泣旣澆汨蒼祇將紊毀身國臣進退惟  
疑再三自顧實以陋情悲忘寵極但畏軼超疲  
伍廼參鼎軸無德而貴豈敢偷存才怯任重物

所不恕故弱識褊舉頻布前辭枯木朽株永隔  
蠲恕豈特大車方塵小雅有廢而已哉將據致  
寇之悔取鑒於茲矣且皇華之命居上之鴻私  
鳳舉之招爲下之殊榮國勲必書史不謬牘況  
臣連牧圉岳董率職方旣鑠近古垂耀中葉揆  
望揣實爲泰已甚而廼復降朱輪之使方枉青  
蒲之勸寤寐惛灼諒無以任輒重素誠冒覬神  
炤伏願皇靈特垂開愍賜停正台之職并免敦  
勸之使餘所榮忝誓不敢辭肅恭外屏祈廻恩



授則於臣慊欵復爲惠造不任憂越匪惶之情

爲蕭太尉子姪拜領軍江州兗州豫州淮

南黃門謝啓

臣公言臣頻結崇寵亟廷上爵休恩動俗烈榮  
擬古鴻品清節已請金圖秀鼎號銘其茂瑤篆  
永言戚慮鑒寐殷心況乃秩洽朝門慶霑國珮  
弱息臣諱疑映晃等文不昭典武不定功出內  
帷間升降貂綬或振迹領候職贊禁錡或騰光  
江甸任鈎屏翼河兗衝要旣濫北門之管淮豫  
險捍又謬西偏之寄兄子臣鸞忝守近畿嫡孫

臣某載華省闥皆倏忽昇景頻頻升荷雖咸聲  
愚識恪居匪替豈足以少塞神渥裁酬皇眷囂  
黷一盈慙厲彌積談天之辨不能爲臣陳辭雕  
龍之文無以爲臣飾愧靜然肅念裴徊交集不  
任憂感沐浴之情

上書

獄中上建平王書

昔者賤臣叩心飛霜擊於燕地庶女告天振風  
襲於齊臺下官每讀其書未嘗不廢卷流涕何  
者士有一定之論女有不易之行信而見疑貞  
而爲戮是以壯夫義士伏死而不顧者也下官  
聞仁不可恃善不可依謂徒虛語乃今知之伏  
願大王暫停左右小加憐察下官本蓬戶桑樞  
之民布衣韋帶之士還不飾詩書以驚愚進不

買名聲於天下目者謬得升降承明之闕出人  
金華之殿何嘗不局影凝嚴側身局禁者乎竊  
慕大王之義復爲門下之賓備鳴盜淺術之餘  
豫三五賤伎之末大王惠以恩光顧以顏色實  
佩荆卿黃金之賜竊感豫讓國士之分常欲結  
纓伏劍少謝萬一剖心摩踵以報所天不圖小  
人固陋坐胎謗歟迹墜昭憲身限幽圉履影弔  
心酸鼻痛骨下官聞虧名爲辱虧形次之每一  
念來忽若有遺加以涉旬月迫季秋天光沈陰

左右無色身非木石與獄吏爲伍此少卿所以  
仰天搥心泣盡而繼之以血者也下官雖乏鄉  
曲之譽然嘗聞士君子之行矣其上則隱於簾  
肆之間卧於巖石之下次則結綬金馬之庭高  
議雲臺之上次則虜南越之君係單于之頸俱  
啓丹冊並圖青史寧當爭尺寸之末競錐刀之  
利哉下官聞積毀銷金積讒糜骨遠則直生取  
疑於盜金近則伯魚被名於不義彼之二子猶  
或如是況在下官焉能自免昔上將之耻絳侯

幽獄名臣之羞史遷下室至於下官當何言哉  
夫以魯運之智辭祿而不返接輿之賢行歌而  
忘歸子陵閉關於東越仲蔚杜門於西秦亦良  
可知也若使下官事非其虛罪得其實亦當鉗  
口吞舌伏七首以殞身何以見齊魯奇節之人  
燕趙悲歌之士乎方今聖曆欽明天下樂業青  
雲浮洛榮光塞河西泊臨洮狄道北距飛狐陽  
原莫不浸仁沐義昭景飲醴而下官抱痛園門  
含憤獄戶一物之微有足悲者仰惟大王少垂

明白則梧丘之冤不愧於沈首鵠亭之鬼無恨  
於灰骨不任肝膽之切敬因執事以聞此心旣  
照死且不朽



與交友論隱書

淹者海濱窟穴弋釣爲伍自度非奇力異才不足聞見於諸侯每承梁伯鸞卧於會稽之墅高伯達坐於華陰之山心常慕之而未能及也嘗感子路之言不拜官而仕無青組紫綬龜紐虎符之志但欲史曆巫卜爲世俗賤事耳而黥然十載竟不免衣食之敗何則性有所短不可韋弦者有五一則體本疲緩卧不肯起二則人間

應脩酷嬾作書三則賓客相對口不能言四則  
性甚畏動事絕不行五則愚婢妄發輒被口語  
有五短而無一長豈可處人間耶知短而不可  
易者所謂輪椎分定也猶如雞鶩之有毛不能  
得鸞鳳之光采矣况今年已三十白髮雜生長  
夜輾轉亂憂非一以湍至之命如星殞天促光  
半路不攀長意徒自欺取筋鷄髓冷殊多災恙  
心頑質堅偏好冥默旣信神農服食之言久固  
天竺道士之說守清淨煉神丹心甚愛之行善

業度一世意甚美之今但願拾薇蕨誦詩書樂  
天理性歛骨折步不踐過失之地耳猶以妻孥  
未奪桃李須陰望在五畝之宅半頃之田鳥赴  
簷上水匝階下則請從此隱長謝故人若乃登  
峩峩度流沙殲金石讀仙經嘗聞其驗非今日  
之所言也誰謂難知青鳥明之貴布筆墨然亦  
焉足道哉

報袁叔明書

僕知之矣高舉爲別執手末期浮雲色曉悵然  
魂飛前辱贈書知命僕息心越地採藥稽山友  
人幸甚去歲迫名茂才冬盡不獲有報引領於  
邑情詎可及足下推僕者不一二談也僕聞狂  
士之行有三竊嘗志之其奇者則以紫天爲宇  
環海爲池保身大笑被髮行歌其次則堅坐崩  
岸僵卧深窟朝食松屑夜誦仙經其下則辭榮  
城市退耕巖谷塞逕絕賓杜牆不出然者皆羞

爲西山之餓夫東國之黜臣而况其鄉黨乎或  
有社稷之士入而忘歸則爭論南宮之前衛王  
於邪伏身比闕之下納君於治至乃一說之奇  
驚畏左右一劍之功震慄鄰國夫能者惟橫議  
漢庭怒髮燕路且猶不數而况於鄰里乎若僕  
之行止已無可言矣材不肖文質無所直徒以  
結髮游學備聞士大夫言曰在國忠處家孝取  
與廉交友義故拂衣於梁齊之館抗手於楚趙  
之門且十年矣容貌不能動人智謀不足自遠

竟悲君子之恩卒離饑寒之禍近親不言左右  
莫教涼秋陰陰獨立閑館輕塵入戶飛鳥無迹  
命保琴書而守妻子其可得哉故國史小官也  
而子長爲之執戟下位也而子雲居之僕非有  
輕車驃騎之畧交河雲險之功幸以盜竊文史  
之末因循卜祝之間故俛首求衣歛衽寄食耳  
若十口之糴去於饑寒從疾舊里斥歸故鄉簞  
坐高視舉酒極望雖五侯交書羣公走幣僕亦  
在南山之南矣此可爲智者道難與俗士言也

方今仲秋風飛平原影色水鳥立於孤洲蒼葭  
變於河曲寂然淵視憂心辭矣獨念賢明蚤世  
英華殂落僕亦何人以堪久長一旦松柏被地  
墳壟刺天何時復能銜杯酒者乎忽忽若狂願  
足下自愛也

勅爲朝賢答劉休範書

昔媯道鼎昌千羽未能戡姬德昭宣長旌猶卷  
舒焚衣毀冕有自來矣皇宋靈武誕命聖道鬱  
宏三后連光四聖胥軌或經天緯地構紫靈之  
符調風偃海隆黃旗之祚莫不頌滿金石聲影  
宇宙者也暨我太宗明皇帝惟岳降聖重耀禹  
夏延禮壁臺訪道衢室平陽之后卷迹慙靈空  
同之君歛功謝德是以彩雲祥風之瑞布濩區  
中梯山棧火之俗款獫請吏跨商軼夏洗周滌



漢道澤優衍猶不道封禪遐靈在天餘惠無泯  
至上文明金相穆然玉色履壁之禎獲珪之應  
著在紀歲仁浚汙河惠愛秋草想亦君之所聞  
也重以先帝靈略潛通英轡遠馭受話言必忠  
貞方肅之臣奉風聲必虔恭匪懈之士明時琴  
瑟鼎鉉之盛且被於寧世而忽覲來書以惋以  
慨君爲齊梁楚越之主鼎貴一時金玉滿堂文  
馬千駟置授湯沐冠蓋於道惟名尊崇誰與爲  
雄而出言效尤吐音入戾舉旗類社志竊神禁

稱兵歛衆遂窺外關今朝無闕政頓構凌上之  
節室無孽堅坐生莫大之疊鴟梟赭衣號興徒  
黨王萃淵藪寧茲之甚不滅不軌不忠不義未  
有若斯者也宗枝之釁遠則吳楚見禽於一壁  
盤石之變近則江荆而縛於小將成敗蘭艾之  
鑒又亦君之所知也聞彼血飲鼠舞之異早見  
物微河北隴上之謠已露童詠所謂妖由人作  
孽不可逃然桓侯之患良助寒心今羽林黃頭  
絡驛爭引熊渠飲飛首尾電發伏波樓船掩江

蔽汜渡遼甲卒克野布黑加以先天蓋世之略  
蕩源拔山之威任輔沛陳羽林鵠鷁露動龍驤  
精騎風驅然後六師雲起九軍星連蜺旌外江  
虹艦中水金甲映平陸鐵馬炤長原楚南嶽而  
永慨瞰九派而懷悲伐罪弔民復驗於茲甫刑  
三千唯此爲大僕才等不羈志瀝丹款故奏禍  
福行矣悵然哀楮劉蕭等疏

江醴陵集卷之十三

梁濟陽江淹文通著

明閩漳張燮紹和纂

論

無爲論

昔曾廻向正覺歸依福田友人勸吾仕吾志不改故著無爲論焉

有奕葉公子者聯蟬七代冠冕組望多素純黼衣繡裳負長劍而耿耿佩鳴玉而鏘鏘時遊稷

下或客於梁間英雄而豹變聽利害以龍驤乃  
動朱履而馳寶馬振玉勒而曜金羈之無爲先  
生之門問曰先生智德光融嵩華無得以方其  
峻道義清遠溟海不足以喻其深無學不窺無  
事不達容儀閒靜言笑溫雅至如釋迦三藏之  
典李君道德之書宣尼六藝之文百氏兼該之  
術靡不詳其津要而採撫冲玄煥乎若覩於鏡  
中炳乎若明於掌內余聞天地之大德曰生何  
以聚人曰財是故老聃以爲柱史莊周以爲園

東東方持戟而不倦尼父執鞭而不耻寶萬古  
之師範一時之高士先生嘉遁卷迹養德不仕  
乃列子之所待非通天下之至理雖江海以爲  
榮實縉紳之所鄙先生倏爾笑而應之曰富之  
與貴誰不欲哉乃運而不通也夫忠孝者國家  
之急務也申生伍員不得志也懷道抱德玄風  
之所尚楊雄東方其職未高也其大學者不過  
儒墨亦栖栖遑遑多有不遂也子所引之士者  
情雖欲之志不行也憂喜不移其情故可爲道

者也過此已往焉足言哉吾聞大人降迹廣樹  
慈悲破生死之樊籠坐涅槃之彼岸闢三乘以  
誘物去一相以歸真有智者不見其去來有心  
者莫知其終始使得湛然常住永絕殊塗無變  
無遷長松百慮恬然養神以安志爲業欲使自  
天祐之吉無不利舒卷隨取進退自然遁逸無  
悶幽居永貞亦何榮乎亦何鄙乎子其得之吾  
何失之塵內方外於是乎著公子恣然而有慚  
德逡巡而退

頌

閩中草木頌十五首

有序

僕一命之微遭萬代之幸不能鑄心礪骨以報  
所事擢翼驤首自致丹梯爰乃恭承嘉惠守職  
閩中且僕生人之樂久已盡矣所愛兩株樹十  
莖草之間耳今所鑿處前峻山以蔽日後幽晦  
以多阻饑餒搜索石瀨茭茭庭中有故池水常  
決雖無魚梁釣臺處處可坐而葉饒冬榮花有  
夏色茲赤縣之東南乎何其奇異也結莖吐秀



數千餘類心所憐者十有五族焉各爲一頌以  
寫勞覓

金荊

江南之山連障連天旣抱紫霞亦漱絳煙金荊  
嘉樹涵雲宅仙姝節詎及幽意誰傳

相思

竦枝碧澗卧根石林日月斷色霧雨恒陰綠秀  
八炤丹實四臨公子不至山客徒尋

豫章

伊南有材匪桂匪椒下貫金壤上籠赤霄盤薄  
廣結梢瑟曾喬七年乃識非日終朝

枌櫚

異木之生疑竹疑草攢叢石逕森蓀山道煙岫  
相珍雲壑其實不華不縟何避工巧

杉

桐梓舊麗松栝稱奇焉如茲品獨秀青崖群木  
歛望雜草不窺長入煙氣永參鸞螭

檉

木貴冬榮裡實寒色停黛峰頂插翠石側碧葉  
菴藹頽柯翕絕方陋筠櫝遠笑荊棘

楊梅

實跨荔使芳軼木蘭懷藥挺實涵黃糝丹鏡日  
繡窰炤霞綺繡爲我羽翼委君玉盤

山桃

惟園有實惟山有叢丹朶擎露紫榮繞風引霧  
如電映煙成虹伊春之秀乃華之宗

石榴

美木艷樹誰望誰待縹葉翠萼紅華絳采熠列  
泉石芬披出海奇麗不移霜雪空改

木蓮

迸采泉壑騰光淵丘緗麗碧巖紅艷桂洲山人  
結侶靈俗共遊時至不採爲子淹留

石菖蒲

藥實靈品爰乃輔性却痾衛福蠲邪養正縹色  
外妍金光內映草經所珍仙圖是詠

黃蓮

黃連上草丹砂之次禦孽辟妖長靈久視驂龍  
行天馴鳳匝地鴻飛以儀順道則利

薯蕷

華不可炫葉非足憐微根儻餌棄劍爲仙黃金  
共壽青髓爭年君謂無妄我驗衡山

杜若

山中杜若嘉爾翠質不奇不俗載華載實同衡  
夕露共炯朝日夷陂無二沈冥如一

藿香

桂以過冽麝以太芬摧阻天壽夭折人文詎及  
藿香微馥微薰歸靈百仞養氣青霄

讚

銅劍讚

有序

永明初始造舊宮鑿東北之地皆平岡迤隴尤  
多古墓墓有人得銅劍長尺五寸余既借看歎  
其古異客有謂余曰古時乃以銅爲兵乎其可  
得而聞不余笑而應曰此證據甚多殆不俟言  
卿旣欲知輒具言之余按山海經曰昆吾之山  
其上多赤銅郭璞注曰此山出金如火以之切  
玉如割泥也周穆王時西戎獻之尸子所謂昆

昔之劍也越絕書曰赤堽之山破而出錫若邪之谿洞而出銅歐冶鑄以爲純鉤之劍又汲冢中得一銅劍長三尺五及今所記干將者亦皆非鐵明古者以銅錫爲兵器也周書稱穆王時征犬戎得昆吾之劍火浣布長尺有咫又有鍊銅赤刀割玉如泥焉又左傳僖公十八年鄭伯始朝于楚楚賜之金旣而悔之盟曰無以鑄兵故以鑄三鐘杜預注云楚金利故也古者以銅爲兵故禹貢云荆揚貢金三品余以爲古者語



其難解今者語文而易了獨詩云元龜象齒  
其實象牙也書云厥包櫛柚乃黃梓也金品上  
則黃中則赤下則黑黑金是鐵赤金是銅黃金  
是金黃金可爲寶赤金可爲兵黑金可爲器韓  
子稱昔智伯繇之伐趙襄子初晉陽襄子金將  
盡問於張孟談孟談對曰吾聞董安于治晉陽  
也公室悉以銅爲柱質君可發而用之於是發  
之有餘金矣謂此據蓋可知焉又昔夏后氏使  
九牧貢金鑄九鼎於荆山之下于昆吾氏之墟

白若甘攬之地圖其山川奇怪以形于鼎使民  
知神姦不逢其害以定其祥鼎成三足而方不  
炊而自沸不昇而自藏不遷而自行九鼎旣成  
定之國都桀有昏德鼎遷於商殷紂暴虐鼎遷  
於周每人主休明鼎雖小而重其姦回昏亂雖  
大而輕及周顯王三十二年姬德大衰乃淪入  
泗水秦始皇之初見于彭城二十七年始皇東  
遊大發徒出之而不能得焉後漢武帝賓禮百  
神于汾陰得大鼎時人以爲九鼎其祥不可得

百器也且荆軻刺秦王之日匕首鑿銅柱銅柱  
火出則古者非直以銅爲匕首亦以爲殿柱也  
且始皇之世長狄十二見於臨洮身長三丈足  
跡六尺於是始皇歛天下之兵鑄而象之故西  
京賦云高門有閼列坐金狄是也又造阿房之  
宮其門悉用磁石磁石喻鐵以防外兵之入焉  
以此推之明知春秋迄于戰國戰國至于秦時  
攻爭紛亂兵革互興銅既不克給故以鐵足之  
鑄銅旣難求鐵甚易是故銅兵轉少鐵兵轉多

年甚一年歲甚一歲漸染流遷遂成風俗所以  
鐵工比肩而銅工稍絕二漢之世逾見其微及  
漢建安二十四年魏文帝爲太子時鑄三寶刀  
二匕首天下百鍊之精利而悉是鑄鐵不能復  
鑄銅矣按張華博物志亦稱鑄銅之工不復可  
得唯蜀地羌中時有解者由此言之斯妙久絕  
余謂不復能鑄銅者正當不能使利如霜雪光  
如雲霞陸斬犀兕水斷蛟龍豈復不能鑄銅鑑  
鏡燈耶然今太極殿前兩大銅鏡卽周景王鑄

也製作精巧獨絕晚世今之作必不及古猶今  
鏡不及古鏡今鐘不及古鐘矣昔余爲吳興令  
鑿池又獲銅箭鏑數十枚時有人復於彼山中  
伐木得銅斧一口古銅鑄爲兵豈爲一據故備  
言其詳以發子之蒙矣古貴銅賤鐵非獨此事  
按皇覽帝王冢墓記稱吳王闔閭冢銅槨三重  
永池六尺玉鳧之流扁諸之劍三盤郢魚腸之  
劍在焉秦始皇冢亦以銅槨水銀爲江河關東  
賊發之至銅槨而取銅深大不可多得因此穴

塞漢思王冢時奢侈皆生葬取愛幸奴婢蓄  
穀爲銅窻以通殉葬者氣息兼以水火守冢給  
呼召數十年乃不復聞聲矣晚世之葬無復此  
例然猶自大奢大富大盛或傾一國之財或竭  
一家之寶或爭爲宏麗或競相高尚前漢奢于  
後漢魏時富于晉世中原旣夷至於江左時天  
下凋喪制度日衰富貴之家猶或厚葬然論古  
論襲亦減損千萬倍矣世愈貧狹衰禮愈薄又  
往古之事棺皆不用釘悉用細腰其細腰之法

長七寸廣三寸厚二寸五分狀如木秤兩頭大  
而中央小仍鑿棺際而安之因普漆其外一棺  
凡用細腰五十四枚大略如此亦可謂至巧矣  
其法既絕亦有銅釘銅釘之體皆如今柩釘形  
也銅釘既滑多被發掘自義熙以來乃以柩伐  
銅爰及明器之屬亦多減省必不得已乃用烏  
牙焉相與皆用素棺不得施漆及自棺之外一  
無所設既由貧富之懸兼以避患之及耳故爲  
此讚以明古今銅鐵之兵亦葬送之事焉乃成

讚曰

悠悠開闢或聖或賢蚩尤鑄銅爲兵幾年天生  
五才實此爲先旣古旣曩誰測誰傳紛綸百代  
事無不異况廼金鐵國之利器風胡專精歐冶  
妙思於昔則出於今則秘聞之釋經萬物澹薄  
在古必厚在今必惡徒侈徒異徒鏹徒削聊舉  
一槩以明鴻略



雲山讚四首

有序

壁上有襍畫皆作山水好勢仙者五六雲氣  
生焉悵然會意題爲小讚云

王太子

子喬好輕舉不待鍊銀丹控鶴去窈窕學鳳對  
嶠崦山無一春草谷有千年蘭雲衣不躑躅龍  
駕何時還

陰長生

陰君惜靈骨珪碧詎爲寶日夜名山側果得金

江醺隱集 卷十三  
丹道憂傷永不至光顏如碧草若渡西海時致  
意三青鳥

白雲

紫煙世不覲赤鱗庖所捐白雲亦海外蒼蒼起  
三山蕭瑟玉池上容裔帝臺前欲知青都裏乘  
此乃登天

秦女

青琴旣曠世綠珠亦絕羣猶不及秦女十五乘  
綵雲壁質人不見瓊光俗詎聞願使洛靈徃爲

我道奇芬

江陵集卷之十四

梁齊陽江淹文通著

明閩漳張燮紹和纂

誄

齊太祖高皇帝誄

日月鬱華風雲黯色傷動紫微悲匝璇極嗚呼  
哀哉粵夏四月辛卯將遷座于泰安陵龍鑾既  
整羽衛以陳深酸舊物掩咽故臣嗣皇帝永訣  
丹掖叫號青墀攀神光之一絕慟遠邇之何期

弓劍有慕慕德寫辭僉曰若稽古聖璿圖靈鏡  
星驅發祥電光啓命誕惟弱齡惠志聰情如金  
如璧爰秀爰英於鑠冠歲騰華流藝允文允武  
克明克睿聿尙登學嚴道尊師宣敷五禮優游  
六詩上炫舊滯旁鏡前疑才罄艷采筆盡麗辭  
在友斯悌于親伊孝儉泰共色夷阻一貌遊情  
勵矩縱心蹈教鄉術式慕州閭是效業優登仕  
先哲攸懋矧乃寥廓淵規邃構官府天地舟輿  
宇宙龍靜鳳戢歛奇拚秀昔在帝劉王室放命

狡焉僞誕晦朔陵正鋒車北軼燿火南盛太祖  
時乘爰茲發迹塞井滅勳夷竈敵賞鏤王圖  
功繼帝冊乃厲中葉天未歛難兵百袁曹禍十  
楚漢吳地前崩越壤首亂街號燿盛火列金斷  
聚甲如陵獻俘爲觀北楚倔強曾未屈膝雲屯  
被野魚麗亘日廟勇旣消國圖方匱神冊天開  
雄略世出凶劍鱗沈醜戈羽逸隻騎不還騎輪  
無匹厥庸戾止離珮委他榮鬱閭闔寵重山河  
皇彝有文朝采方藹頻頻金紐左右緹蓋毗戎

肅禁參輦侍旒譽馥區中道薨氓外河濟國險  
淮泗邦塵要藩重設匪賢則親亦旣推轂擁土  
庇民聲稜絕俗威贍殊隣宋主陵遐紫殿遏密  
話言之詔貽在英粹寅亮大寶敷綸妙秘世識  
機鑒物宗淵懿無負匪鍊靡輿不洎三階旣馴  
五精惟至彭蠡九江地盡襟製亦有劉範衣纓  
是絕躍馬山岫泛舟河滢縞鏘星流紅旗電結  
鵠翼競扇豺牙爭礪禍纏紫禁兵交丹衛瑤祀  
若於金宸如綴朝野傾儀咸歸上德實賴至公

漢家提國懷險實泰危亡必克機遙朝旦功定  
黜黑妙物更配具章重則深居撫外遙棲縣默  
高秩方臻元禮有序王曰念哉輝寵是與職褒  
官閣任卷文武飾華麗貂縈金疊組宏猷溢俗  
曾芬冠古憬彼朱方亦惟宗秩陰圖食昴潛謀  
質日征輪未誓偏旗銜律原燎旣寂世囂伊謐  
爰崇爰貴以望以實鴈縣告靜象郡無虞杳鬱  
遠域清麗瓊都國填岷負朝委事虛實翳哲相  
嶽曜神居功美旣損道富去益再紐契訓重匡



禹迹方同范張濯情汾射散簪山郊解珮松石  
頽霞拂朝蒼煙懽夕韻屬玄經恩流金液靈厭  
霸德少帝告釁滅慈滅養抵仁抵信枉獄炎鑪  
淫刑霜刃剖忠翦義焚稚斲櫬懔懔萬氓曰怨  
曰震妖蜺將崩災裂昊蒼况乃鼎國資滌資匡  
臨朝闡命遏昏立綱事絲毗漢義締翼商旣綏  
地職亦懋天工權輿典緯俾作司空黼黻珥戈  
祐宇升庸徒賜先袞爰永渥冲實曰驃騎卷迹  
辭功寶寓睦政畿甸綸風沈氏滔天勃逆舊楚

氣歸黃池志轢柏舉裂禮紊度毀經棄序黑騎  
黔山朱旗頽渚短兵相接長鎩爲群顥如海岸  
蠱似蒸雲合乃霧激離則霰分荆國旣軼郢縣  
方焚袁劉二戾焱馳煒發聯謀制外儲兵襲內  
釁激瓊燬勢崩金闕志乘玄璽圖矯秘鉞鴻妖  
逝星高禮棄月惟時諸侯上肱下競圖服滄蕩  
實綴仁聖輝耀國靈導揚王命曾規近晰深臺  
遠鏡左輪朱頽表裏斯定七德飾歌九功絳誅  
乃陟上鉉寵文方輝誕錫有秩綵吹旌旗贊政

瑤光翊教太微寔曰太傅爰登相國緝民以禮  
綜祇以德景福咸湊芳猷允塞羽泳式造絃縣  
是則金湯無險軌書攸同迴迴寵迹窈窈睿功  
寶珪黛壤俾王于東絢冊是敷懋物旣崇設業  
設簾丹懸碧鏞於穆顯相黎元時邕永州炎微  
來獻其琛鴈海龍關亦柔好音梁龜棧鼉越險  
浮深遠戎皆覲上靈必臨山吐石青野降寶露  
瑞芝麗草珍柯爛樹人崩俗締玄緯幽數睠此  
妙德跂我王度造滯炎旻旣變至公萎蕤嫺華

文祖受終大宋有訓高擣萬邦容豫慶雲遊衍  
南風正服寶位圓光玉繩御繡懷古負黼夙興  
丘礪必靜淵漪咸澄助宸有作黔牖其義矜卑  
廣慈合賤兼愛綴機剋賊輕章削罰迹去繁姦  
情歸素一軒靡龍刻楹無丹密越賤申椒楚輟  
靈橘陵寢起邑池藻誰縣遙館罕御離房空薦  
惇教路宮淹神正殿斟酌信義左右律禮瑩彼  
皇維燁茲國體胄業旣樹璧流方啓漢求金岫  
吳寶銅塹寧若睿德讓駟却劍寔才爲貴唯功

是念火職咸允雲官亦熙旣臯乃益匪稷伊夔  
無舛巡風寧竢辯詩玉燭調文玄英最節乘山  
呈瑞航海歸闕不曠景開靡空歲月受緯機衡  
兼甄詩史孫韓各辦莊墨異理昭政徃謫洗鑠  
前軌逍遙星斗徙倚涼雲春飈方舞秋鴻初分  
式謚式詠載績載文邈哉我后淪沔賢聖聲品  
作號盡物歸政蒼黎汰歡玄靈刷慶永戩嘉祉  
方寅景命締詳有文颺沛將掩理昧人訖道懸  
世險夔略遺圖忌華狗儉文闇陳几翌明告漸

與信斷食日月朋精矧在乘輿宇折宙傾祲纏  
鸞掖悲赴紫荷去璇臺之照襲珠殯之冥嗚呼  
哀哉帷宮低景輦路熾光側柏門之黯黯泣松  
帳之茫茫上宮擗而詔御咽群后慕而侍衛傷  
攢靈旣儼遠日以筮鬱鬯旣奠龍酌方撤素月  
夜橫翠煙曉結撝虛金而下歆吟空簫而增絕  
嗚呼哀哉於是颯天駕而從綺輿澁神行而撫  
文輦傍建春而南蹕徑宜陽而東踐尙益蓋而  
未散乍眇默而不轉睇千乘之共啜盼萬騎之

相泣悲魏后之戀譙惻漢王之懷沛辭金陵之  
龍義降雲陽之杳藹風奇響而駐軒煙異色而  
低旆怨街邑之綵驂弔原野之綈蓋挽夫愴而  
征馬凝痛縈盈其如帶嗚呼哀哉複林油雲重  
山減日御房清斐神路冥謐昭徒肅燾幽祇竦  
躡攀光灑動臨泉澍泗璫座長嚴雕宮永闕寂  
帳寂今寂已遠夜釭夜兮夜何遽嗚呼哀哉

傳

袁叔明傳

友人袁炳字叔明陳郡陽夏人其人天下之士  
幼有異才學無不覽文章儼儼清瞻出一時任  
心觀書不爲章句之學其篤行則信義惠和意  
聲如也常念蔭松栢詠詩書志氣跌宕不與俗  
人交俛眉暫仕歷國常侍員外郎府功曹臨湘  
令粟之入者悉散以贍親其爲節也如此數百  
年未有此人焉至乃好妙賞文獨絕於世也又



撰晉史奇功未遂不幸卒官春秋二十有八與  
余有青雲之交非直銜杯酒而已嗟乎斯才也  
斯命也天之報施善人何如哉何如哉

自序傳

淹字文通濟陽考城人幼傳家業六歲能屬詩  
十三而孤邈過庭之訓長遂博覽群書不事章  
句之學頗留精於文章所誦詠者蓋二十萬言  
而愛奇尙異深沉有遠識常慕司馬長卿梁伯  
鸞之徒然未能悉行也所與神遊者唯陳留袁  
叔明而已弱冠以五經授宋始安王劉子真略  
傳大義爲南徐州新安王從事奉朝請始安之  
薨也建平王劉景素聞風而悅待以布衣之禮

然少年嘗倜儻不俗或爲世士所嫉遂誣淹以受金者將及抵罪乃上書見意而免焉尋舉南徐州桂陽王秀才對策上第轉巴陵王左常侍右軍建平王主簿賓待累年雅以文章見遇而宋末多阻宗室有憂生之難王初欲羽檄徵天下兵以求一旦之幸淹嘗從容曉諫言人事之成敗每日燬下不求宗廟之安如信左右之計則復見麋鹿霜棲露宿於姑蘇之臺矣終不以納而更疑焉及王移鎮朱方也又爲鎮軍參軍

事領東海郡丞於是王與不逞之徒日夜構議  
淹知禍機之將發又賦詩十五首略明性命之  
理因以爲諷王遂不悟乃憑怒而黜之爲建安  
吳興令地在東南嶠外閩越之舊境也爰有碧  
水丹山珍木靈草皆淹平生所至愛不覺行路  
之遠矣山中無事與道書爲偶乃悠然獨往或  
日夕忘歸放浪之際頗著文章自娛在邑三載  
朱方竟敗焉復還京師值世道已昏守志閑居  
不交當軸之士俄皇帝始有大功於四海聞而

訪召之爲尙書駕部郎驃騎竟陵公參軍事當  
沈攸之起兵西楚也人懷危懼高帝嘗顧而問  
之曰天下紛紛若是君謂如何淹對曰昔項強  
而劉弱袁衆而曹寡羽號令諸侯竟受一劍之  
辱紹跨躡四州終爲奔北之虜此所謂在德不  
在鼎公何疑焉帝曰聞此言者多矣其試爲我  
言之淹曰公雄武有奇略一勝也寬容而仁恕  
二勝也賢能畢力三勝也民望所歸四勝也奉  
天子而伐逆叛五勝也攸之志銳而器小一敗

也有威而無恩二敗也士卒解體三敗也搢紳  
不懷四敗也懸兵數千里而無同惡相濟五敗  
也故豺狼十萬而終爲我獲焉帝笑曰君談過  
矣是時軍書表記皆爲草具逮東霸城府猶掌  
筆翰相府始置仍爲記室參軍事及讓齊王九  
錫備物凡諸文表皆淹爲之受禪之後又爲驃  
騎豫章王記室參軍鎮東武令參掌詔冊並典  
國史旣非雅好辭不獲命尋遷正員散騎侍郎  
中書侍郎淹嘗云人生當適性爲樂安能精意

苦力求身後之名哉故自少及長未嘗著書惟  
集十卷謂如此足矣重以學不爲人交不苟合  
又深信天竺緣果之文偏好老氏清淨之術仕  
所望不過諸卿二千石有耕織伏獵之資則隱  
矣常願幽居築宇絕棄人事苑以丹林池以綠  
水左倚郊甸右帶瀛澤青春爰謝則接武平臯  
素秋澄景則獨酌虛室侍姬三四趙女數人不  
則逍遙經紀彈琴詠詩朝露幾聞忽忘老之將  
至淹之所學盡此而已矣

墓銘

宋尙書左丞孫緬墓銘

光靈維周肇祀伊衛炤分上代鏡華中世睿誕  
降明秀芳嗣烈學惟物範行實士節容與書林  
優遊史藝素巾俄冠朱紱累轍來訪詩逸入詢  
禮缺麗名文質齊影儒喆慶履匪舒沴氣遽結  
殯帷兮旣晦泉火兮已閉曖遺波於遙緒颯流  
馨於遠歲



宋安成王右常侍劉喬墓銘

丹陽韞聖豐鄉降賢玉葉旣積金徽方傳乃毓  
伊人尅廣克宣騰芬中屬飛藻上年杳杳虐素  
永永冲關雲意霜拍瓊立永堅家寶以瑩國才  
未甄參錯報善茫昧雲玄歛寃幽石委氣空山  
膚若流波身如絕煙芳罪一逝美懋徒鐫

宋光祿大夫孫奭墓銘

川祇効鏡岳祥獻明碧葉獨秀瑤源自清幼頌  
器譽夙耀才名體兼遷雲學備儒史紫閣咸趨  
朱軒旣履貴交慕塵素遊企軌騰藻上京振彩  
下國如彼綠蘭秉芬四塞欷人逕之不平歎天  
路之冥默貴夫君之爲美播靈均與正則

齊御史中丞孫誥墓銘

筠以霜霽蘭以風蕙深哉若人寔好斯文系緒  
承胃激薦驚芬才基魏粲學參漢雲覽志上載  
淦鏡前聞騰名冠俗揚采絕群方勦明世式贊  
睿君如何不淑天道難分敢雕窆石永晰幽墳

齊司徒右長史檀超墓銘

惟金有銑惟玉有瑤君實淵哉行爲世標高志  
洒落逸氣寂寥奧學內溢深文外昭嘉采籍譽  
登國振朝亦既有美筠傷蕙凋人邇運曠世促  
道遼永矣仁矣流芳無澆

行狀

建平王太妃周氏行狀

竊聞侯服之譽非黃冠能救玉食之門寧皂衣  
所述諒畏褻虛美於君后被空名於鼎貴然有  
漢臣誅行晉史書德者亦云實而已焉伏見國  
太妃稟靈惟岳集慶自遠世擅淮汝族冠疇代  
故以載曜聲書式炳騰牒矣太妃誕異離之正  
和函雲露之中氣凝采耀歲賁章笄年若廼彫  
管女圖之學纂組綺縞之工升降處謙之儀柔

靜居順之節莫不中道若性不嚴而成故譽滿  
閭閻聲聞軒殿以元嘉某年歸於故司徒宣簡  
王旣而第高恒倫秩踰外品青軒華轂用光國  
輝素壁丹墀寔隆家貴具惟姻娣靡不式瞻而  
居尊以簡訓卑以弘躬謹蘭閨身撫椒第若衛  
娥之爛行樊蘿之英操方之蔑如也大明二年  
宣簡王薨太妃藉悲用禮撫孤用慈柔懿之德  
愈彰肅敬之問日被雖文伯之冊言不踰閭閻  
相之主行存乎勤無以過也大明某年拜建平

王太妃是時今王春秋方富德業未隆藉茲金  
輿終能玉播故綺襦田宰弱冠升朝者亦太妃  
劬勞之訓也謂天蓋高降年不永以太豫元年  
二月三日薨于荊州之內寢凡厥遠邇以哀以  
歎今祖行有期泉窆無遠素旂望路綵旌思歸  
所以垂宣徽容髣髴金石者謹詳牒行狀具以  
申言

文

蕭太傅東耕祝文

敬祝先穡曰攝提方春黍稷未華灼爍發雲昭  
耀開霞地煦景暖山艷水波側聞農政實惟民  
天競租獻歲務畎上年有渰疏濶興雨導泉崇  
耕巡索均逸共勞命彼倌人稅于青臯羽旗銜  
鎡雄戟耀毫呈典緇耦獻禮翠壇宜民宜稼克  
降祈年願靈之降解珮停鑾神之行兮氣爲輶  
神之坐兮煙爲蓋使嘉穀與玄鬯永爭光而無



沐哉

蕭驃騎祭石頭戰亡文

咸告忠貞之魂曰義爲行首雄實士節嗟爾驍  
驚梟才蹈烈守玉不渝懷永可折氣彰靡旗情  
曠亂轍高墉摧堅巨醜挫銳深痛克矜冤靈及  
雪隆恩殊悼臨爾以歆千秋同盡百齡一世魂  
而有知咸無遠邇嗚呼哀哉

附錄

江淹傳

陳姚察

江淹字文通濟陽考城人也少孤貧好學沈靜少交遊起家南徐州從事轉奉朝請宋建平王景素好士淹隨景素在南兖州廣陵令郭彥文得罪辭連繫淹州獄淹獄中上書景素覽書卽日出之尋舉南徐州秀才對策上第轉巴陵王國左常侍景素爲荊州淹從之鎮少帝卽位多失德景素專據上流咸勸因此舉事淹每從容

諫曰流言納禍二叔所以同亡抵局銜怨七國  
於焉俱斃殿下不求宗廟之安而信左右之計  
則復見麋鹿霜露棲於姑蘇之臺矣景素不納  
及鎮京口淹又爲鎮軍叅軍事領南東海郡丞  
景素與腹心日夜謀議淹知禍機將發乃贈詩  
十五首以諷焉會南東海太守陸澄丁艱淹自  
謂郡丞應行郡事景素用司馬柳世隆淹固求  
之景素大怒言於選部黜爲建安吳興令淹在  
縣三年昇明初齊帝輔政聞其才召爲尚書駕

部郎驃騎參軍俄而荊州刺史沈攸之作亂高  
帝謂淹曰天下紛紛若是君謂何如淹對曰昔  
項強而劉弱袁衆而曹寡羽號令諸侯卒受一  
劍之辱紹跨躡四州終爲奔北之虜此謂在德  
不在門公何疑哉帝曰聞此言者多矣試爲慮  
之淹曰公雄武有奇略一勝也寬容而仁恕二  
勝也賢能畢力三勝也民望所歸四勝也奉天  
子而伐叛逆五勝也彼志銳而器小一敗也有  
威而無恩二敗也士卒解體三敗也搢紳不懷

四敗也懸兵數千里而同惡相濟五敗也故雖  
豺狼十萬而終爲我獲焉帝笑曰君談過矣是  
時軍書表記皆使淹具草相國建補記室叅軍  
事建元初又爲驃騎建安王記室帶裏武令叅  
掌詔冊并典國史尋遷中書侍郎永明初遷驍  
騎將軍掌國史出爲建武將軍廬陵內史視事  
三年還爲驍騎將軍兼尚書左丞尋復以本官  
領國子博士少帝初以本官兼御史中丞時明  
帝作相因謂淹曰君昔在尚書中非公事不妄

行在官寬猛能折衷今爲南司足以振肅百寮  
淹答曰今日之事可謂當官而行更恐才劣志  
薄不足以仰稱明旨耳於是彈中書令謝朓司  
徒左長史王績護軍長史庾弘遠並以久疾不  
預山陵公事又奏前益州刺史劉俊梁州刺史  
陰智伯並贓貨巨萬輒收付廷尉治罪臨海太  
守沈昭略永嘉太守庾曇隆及諸郡二千石并  
大縣官長多被劾治內外肅然明帝謂淹曰宋  
世以來不復有嚴明中丞君今日可謂近世獨

步明帝卽位爲車騎臨海王長史俄除廷尉卿  
加給事中遷冠軍長史加輔國將軍出爲宣城  
太守將軍如故在郡四年還爲黃門侍郎領步  
兵校尉尋爲祕書監永元中崔惠景舉兵圍京  
城衣冠悉投名刺淹稱疾不往及事平世服其  
先見東昏末淹以祕書監兼衛尉固辭不獲免  
遂親職謂人曰此非吾任路人所知正取吾空  
名耳且天時人事尋當翻覆孔子曰有文事者  
必有武備臨事圖之何憂之有頃之又副領軍



王瑩及義師至新林淹微服來奔高祖拔爲冠軍將軍祕書監如故尋兼司徒左長史中興元年遷吏部尚書二年轉相國右長史冠軍將軍如故天監元年爲散騎常侍左衛將軍封臨沮縣開國伯食邑四百戶淹乃謂子弟曰吾本素宦不求富貴今之忝竊遂至於此平生言止足之事亦以備矣人生行樂耳須富貴何時吾功名旣立正欲歸身草萊耳其年以疾遷金紫光祿大夫改封醴陵侯四年卒時年六十二高祖

爲素服舉哀賻錢三萬布五十匹謚曰憲伯淹  
少以文章顯晚節才思微退時人皆謂之才盡  
凡所著述三百餘篇自撰爲前後集并齊史十  
志並行於世子薦襲封嗣自丹陽尹丞爲長城  
令有罪削爵普通四年高祖追念淹功復封薦  
吳昌伯邑如先

江淹傳

李延壽

江淹字文通濟陽考城人也父康之南沙令雅有才思淹少孤貧常慕司馬長卿梁伯鸞之爲人不事章句之學留情於文章早爲高平檀超所知常升以上席甚加禮焉起家南徐州從事轉奉朝請宋建平王景素好士淹隨景素在南兖州廣陵令郭彥文得罪辭連淹言受金淹被繫獄自獄中上書景素覽書卽日出之尋爲南徐州秀才對策上第再遷府主簿景素爲荊州

淹從之鎮少帝卽位多失德景素專據上流咸  
勸因此舉事淹每從容進諫景素不納及鎮京  
口淹爲鎮軍叅軍領南東海郡丞景素與腹心  
日夜謀議淹知禍機將發乃贈詩十五首以諷  
焉會東海太守陸澄丁艱淹自謂郡丞應行郡  
事景素用司馬柳世隆淹固求之景素大怒言  
於選部黜爲建安吳興令及齊高帝輔政聞其  
才召爲尚書駕部郎驃騎叅軍事俄而荊州刺  
史沈攸之作亂高帝謂淹曰天下紛紛若是君

謂何如淹曰昔項強而劉弱袁聚而曹寡羽卒  
受一劍之辱紹終爲奔北之虜此所謂在德不  
在勢公何疑哉帝曰試爲我言之淹曰公雄武  
有奇略一勝也寬容而仁恕二勝也賢能畢力  
三勝也人望所歸四勝也奉天子而伐叛逆五  
勝也彼志銳而器小一敗也有恩無威二敗也  
士卒解體三敗也搢紳不懷四敗也懸兵數千  
里而無同惡相濟五敗也雖豺狼十萬終爲我  
獲焉帝笑曰君談過矣桂陽之役朝廷周章詔

檄久之未就齊高帝引淹入中書省先賜酒食  
淹素能飲啖食鵝炙垂盡進酒數升訖文誥亦  
辦相府建補記室叅軍高帝讓九錫及諸章表  
皆淹製也齊受禪復爲驃騎豫章王嶷記室叅  
軍建元二年始置史官淹與司徒左長史檀超  
共掌其任所爲條例並爲王儉所駁其言皆不  
行淹任性文雅不以著述在懷所撰十三篇竟  
無次序又領東武令叅掌詔策後拜中書侍郎  
王儉嘗謂曰卿年三十五已爲中書侍郎才學

如此何憂不至尚書金紫所謂富貴卿自取之  
但問年壽何如爾淹曰不悟明公見眷之重永  
明三年兼尚書左丞時襄陽人開古冢得玉鏡  
及竹簡古書字不可識王僧虔善識字體亦不  
能讀直云似是科斗書淹以科斗字推之則周  
宣王之簡也簡殆如新少帝初兼御史中丞明  
帝作相謂淹曰君昔在尚書中非公事不妄行  
在官寬猛能折衷今爲南司足以振肅百僚也  
淹曰今日之事可謂當官而行更恐不是仰禮

明旨爾於是彈中書令謝朓司徒左長史王績  
護軍長史庾弘遠並以托疾不預山陵公事又  
奏收前益州刺史劉峻梁州刺史陰智伯並贓  
貨巨萬輒收付廷尉臨海太守沈昭略永嘉太  
守庾曇隆及諸郡二千石并大縣官長多被劾  
內外肅然明帝謂曰自宋以來不復有嚴明中  
丞君今日可謂近世獨步累遷祕書監侍中衛  
尉卿初淹年十三時孤貧常採薪以養母曾於  
樵所得貂蟬一具將鬻以供養其母曰此故汝



之休微也汝才行若此豈長貧賤也可留待得  
侍中著之至是果如母言永元中崔慧景舉兵  
圍都衣冠悉投名刺淹稱疾不往及事平時人  
服其先見東昏末淹以祕書監兼衛尉又副領  
軍王瑩及梁武至新林淹微服來奔位相國右  
長史天監元年爲散騎常侍左衛將軍封臨沮  
縣伯淹乃謂子弟曰吾本素官不求富貴今之  
忝竊遂至於此平生言止足之事亦以備矣人  
生行樂須富貴何時吾功名旣立正欲歸身草

萊耳以疾遷金紫光祿大夫改封醴陵侯卒武帝爲素服舉哀謚曰憲淹少以文章顯晚節才思微退云爲宣城太守時罷歸始泊禪靈寺渚夜夢一人自稱張景陽謂曰前以一匹錦相寄今可見還淹探懷中得數尺與之此人大恚曰那得割截都盡顧見丘遲謂曰餘此數尺旣無所用以遺君自爾淹文章躓矣又嘗宿於治亭夢一丈夫自稱郭璞謂淹曰吾有筆在卿處多年可以見還淹乃探懷中得五色筆一以授之

爾後爲詩絕無美句時人謂之才盡凡所著述  
自撰爲前後集并齊史十志並行於世嘗欲爲  
赤縣經以補山海之缺竟不成子爲嗣

夢筆山

宋黃伯雲

芙蓉幻出畫難成  
文藻由來屬俊英  
五彩曾遺當日夢  
百年猶有故山名  
歲寒寥落松筠秀  
月夜悲涼鶴鶴驚  
惆悵江淹人去遠  
載瞻南浦夕雲橫

夢筆晴嵐

無名氏

雨餘夢筆擁晴嵐  
猶似高人睡正酣  
草木至今成五彩  
頓教春意滿江南

遺事

齊武帝時諸王年少不得妄接人勅庾杲之江

淹五日一詣諸王使申遊好

南史

集評

齊世祖問王僕射當今誰能爲五言詩王荅曰

謝朓得父膏腴江淹有意

世說新語

文通詩體總雜善於摹擬筋力於王微成就於

謝朓

詩品

鮑照江淹古之侔者也其文急以怨

文中子

梁典云江淹有集十卷深信天竺緣果之文余

檢其行事與傳同焉綴述佛理不多錄其別篇

知明賢之雅志耳

釋道宣廣弘明集

江醴陵集

附錄

十二

團扇二篇江則假象見意班則貌題直書江生  
詩曰畫作秦王女乘鸞向煙霧興生於中無有  
古事假使佳人阮之在手乘鸞之意飄然莫偕  
雖蕩如夏姬自忘情改節吾許江生情遠詞麗  
方之班女未可減價

皎然詩評

江淹清婉秀麗才思有餘雜擬之作如季札聘  
魯四代之樂並歌于庭非天下至聰其孰能喻

竹林詩評

擬古江文通最優擬淵明似淵明擬康樂似康

樂擬左思似左思擬郭璞似郭璞獨擬李都尉

一首不似西漢耳

滄浪詩評